



CONVOCATORIA DE AXUDAS PARA O TRANSPORTE URBANO NA CIDADE DA CORUÑA E PARA AS ÁREAS DE TRANSPORTE METROPOLITANO DA CORUÑA E DE FERROL (CURSO 2018-19)

OBXECTO E PERSOAS BENEFICIARIAS

A Universidade da Coruña (UDC) convoca 2070 axudas para o transporte urbano na cidade da Coruña e para transporte metropolitano da Coruña e Ferrol destinadas ao alumnado da UDC que estea matriculado no curso 2018-19 dun mínimo de 30 créditos nunha titulación oficial no campus da Coruña ou no campus de Ferrol e cumpra os requisitos esixidos nesta convocatoria.

Non se poderá beneficiar desta axuda o alumnado que estea realizando unha mobilidade estatal (SICUE) ou internacional (ERASMUS e asimilables) no curso 2018/19, independentemente da duración da estadía, nin aquel alumnado que estea en plans de estudos sen dereito a docencia.

NORMAS DE APLICACIÓN

A esta convocatoria seralle de aplicación a seguinte normativa, así como os criterios económicos e patrimoniais regulados nela:

- Real decreto 1721/2007, do 21 de decembro, polo que se establece o réxime de bolsas e axudas ao estudo personalizadas (BOE do 17 de xaneiro)
- Real decreto 951/2018 do 27 de xullo, polo que se establecen os límites da renda e patrimonio familiar e as contías das bolsas e axudas ao estudo para o curso 2018-19 e se modifica o Real decreto 1721/2007, do 21 de decembro (BOE do 1 de agosto)
- A Resolución da Secretaría de Estado de Educación e Formación Profesional pola que se convocan bolsas de carácter xeral para o curso académico 2018-19 para estudantes que cursen estudos postobrigatorios (BOE do 16 de agosto de 2018)

MODALIDES E CONDICIÓNS PARA SE BENEFICIAR DAS AXUDAS

As modalidades de axudas serán dúas: unha destinada ao transporte urbano da cidade da Coruña e outra destinada ao transporte metropolitano das áreas metropolitanas da Coruña e de Ferrol.

Para se poder beneficiar destas axudas no transporte urbano da Coruña ou metropolitano será requisito inescusable posuír o seguinte:

- A Tarxeta Millenium no caso do transporte urbano na cidade da Coruña. Para axilizar a xestión da axuda, no caso de que non teña a citada tarxeta, recoméndaselle ao alumnado solicitala canto antes, para o que debe acudir ás oficinas do Concello da Coruña sitas na Estación de Autobuses, no Ágora ou ben no Pazo de María Pita.
- A Tarxeta do Transporte Metropolitano de Galicia para as áreas metropolitanas:
 - a) No caso do alumnado da UDC que curse estudos na Coruña os desprazamentos bonificados son os desprazamentos entre calquera concello da área de transporte metropolitano da Coruña e os concellos da Coruña e de Oleiros en que se localizan as dependencias universitarias. A relación de concellos que integran a ATM da Coruña aparece recollida na seguinte ligazón: <http://tmg.xunta.gal/area-da-coruna>
 - b) No caso de alumnado da UDC que cursa os seus estudos en Ferrol os desprazamentos bonificados neste caso son os desprazamentos entre calquera



dos concellos da Area de Transporte Metropolitano de Ferrol e o concello de Ferrol en que se localizan as dependencias universitarias. A relación de concellos que integran a ATM de Ferrol aparece recollida no seguinte enlace web: <http://tmg.xunta.gal/area-de-ferrol>

En ningún caso se aplicarán estas bonificacións aos desprazamentos que se realicen fóra das ATM citadas ou que supoñan relacións entre concellos que pertencen a dúas áreas metropolitanas distintas.

O alumnado que curse estudos na Facultade de Ciencias do Deporte e a Educación Física e resida no concello da Coruña terá que posuír a TMG para se poder beneficiar da axuda. A tarxeta Millenium non dá dereito a esta bonificación.

A TMG débese adquirir ao prezo unitario establecido nas oficinas da entidade bancaria colaboradora no Plan de transporte metropolitano de Galicia na seguinte ligazón: <https://tmg.xunta.gal/tarxeta-metropolitana-introducion>

O aboamento das axudas a través da TMG farase efectivo para as persoas beneficiarias no momento en que estas efectúen a recarga da tarxeta a finais do mes seguinte a aquel en que se comecen a aplicar as axudas. As persoas beneficiarias dispoñen dun prazo de dous meses para efectuar a recarga da axuda. No caso de non a facer neste prazo esta recarga caducará e perderán o dereito a percibir a axuda. As persoas beneficiarias das axudas poden consultar o estado das súas recargas na seguinte ligazón: <http://tmg.xunta.gal/consulta-tarxeta>

No caso da tarxeta Millenium para transporte urbano o alumnado terá un prazo de dous meses para a activar desde a resolución definitiva da convocatoria. No caso de non o facer así perderá o dereito á axuda. A tarxeta Millenium poderá ser utilizada no curso seguinte por aquel alumnado que non esgotara a totalidade das viaxes subvencionadas e continúe estudos na UDC para o curso seguinte, ata esgotar as viaxes ou ata o 30 de novembro de 2019.

O número máximo de anos en que un/unha alumno/a se pode beneficiar desta axuda será o seguinte:

- Para os estudos das ramas de enxeñaría e arquitectura: dous anos máis dos establecidos no plan de estudos.
- Para o resto dos estudos: un ano máis dos establecidos no plan de estudos.

CONTÍA DAS AXUDAS

O importe máximo da subvención por cada alumno/a será en todos os casos de **120 €**

- a) No caso do campus da Coruña e para usar no transporte urbano coa tarxeta Millenium disporá de **300** viaxes subvencionadas pola Universidade con 0,40 euros cada unha.
- b) No caso das áreas de transporte metropolitano (ATM) e usando a tarxeta de transporte metropolitano de Galicia (TMG) as porcentaxes de bonificación en relación co número de saltos das viaxes realizadas son as seguintes:



SALTOS DA VIAXE	PREZO DA VIAXE CON TMG	PORCENTAXE DE BONIFICACIÓN	CONTÍA BONIFICADA	PREZO DA VIAXE CON BONIFICACIÓN
0	0,86	50 %	0,43	0,43
1	0,86	50 %	0,43	0,43
2	1,31	40 %	0,52	0,79
3	1,86	35 %	0,65	1,21
4	2,27	30 %	0,68	1,59

FINANCIAMENTO

O financiamento destas axudas, polo importe de 248 400 €, farase con cargo á partida orzamentaria 0300030026 422D 48000 «VEPEU. Bolsas Bono-bus» da UDC.

Concederanse 2070 axudas para as solicitudes que cumpran os requisitos establecidos nesta convocatoria, este número **podará ser incrementado en función da dispoñibilidade orzamentaria.**

CRITERIOS DE ADXUDICACIÓN

As axudas concederanse en función da renda persoal dispoñible (de menor a maior RPD) definida esta como a renda familiar da persoa solicitante, calculada segundo establece o Real decreto 951/2018, do 27 de xullo, polo que se establecen os límites da renda e patrimonio familiar e as contías das bolsas e axudas ao estudo para o curso 2018-19, que modifica o Real decreto 1721/2007, do 21 de decembro (BOE do 1 de agosto).

No caso de empate seralle concedida a axuda á persoa solicitante coa nota media máis alta no expediente académico ou nas probas de acceso á universidade no caso do alumnado que inicie estudos universitarios.

En ningún caso se poderá recibir esta axuda cando a RPD sexa superior aos 13 500 €

SOLICITUDES E DOCUMENTACIÓN

As solicitudes deberanse cubrir a través da aplicación informática a que se accede desde os seguintes enderezos:

<http://aplicacions.sic.udc.es/SolicitudBonobus> ou <http://servizos.udc.es>

Unha vez que se cubra a solicitude, esta deberá ser impresa e asinada polo/a solicitante e mais polos demais membros computables da familia. Xunto coa solicitude haberá que presentar a documentación relacionada no anexo II desta convocatoria.

LUGAR DE PRESENTACIÓN DAS SOLICITUDES

A solicitude presentarase na Sección de Bolsas da UDC (Universidade da Coruña) situada no Pavillón de Estudantes no campus de Elviña, de luns a venres das 9 ás 14 h ou no SAPE do campus de Ferrol (Edificio de Apoio ao Estudo, andar baixo - campus de Esteiro- Ferrol)

PRAZO DE PRESENTACIÓN DAS SOLICITUDES

O prazo de presentación de solicitudes será **desde o día seguinte á súa publicación no taboleiro de anuncios da Sede Electrónica da UDC até o 19 de outubro de 2018.**



RESOLUCIÓN

Unha vez que remate o proceso de avaliación das solicitudes publicarase a relación provisional das solicitudes concedidas e denegadas, xunto coa causa que implica a súa denegación. As persoas interesadas disporán dun prazo de sete días hábiles para achegaren a documentación que permita emendar os erros que se apreciaren. Posteriormente publicarase as relacións definitivas das solicitudes concedidas e denegadas. Todas as listaxes serán publicadas no taboleiro electrónico da UDC. Esta publicación, así como os sucesivos actos de procedemento de concesión cuxa publicación se determina nesta convocatoria, cumprirán cos efectos previstos no artigo 45 da Lei 39/2015, do 1 de outubro, de procedemento administrativo común das administracións públicas.

A Coruña, 27 de setembro de 2018
O reitor

Julio E. Abalde Alonso



ANEXO I

AUTORIZACIÓN PARA OBTEN DATOS DA AXENCIA TRIBUTARIA

A presentación da solicitude de axuda ao transporte coa sinatura da persoa solicitante e demais membros computables da familia implicará a autorización a UDC para obter, a través das correspondentes administracións tributarias, os datos necesarios para determinar a renda e o patrimonio familiar dos membros computables da familia do/a solicitante para os efectos desta convocatoria, así como aquelas outras informacións acreditativas das situacións persoais alegadas e que estean en poder dalgunha Administración pública. Para iso é imprescindible que as solicitudes sexan asinadas por todos os membros computables da familia.

No caso de que a solicitude de axuda para transporte sexa formulada por persoas que formen parte de unidades familiares en que as administracións tributarias non dispoñan de datos, será o/a propio/a solicitante quen debe presentar información fidedigna sobre a situación económica e a renda da súa unidade familiar.

Do mesmo xeito, se existisen dificultades técnicas que impidan ou dificulten a cesión dos datos por parte das administracións tributarias, requiriráselle ao/á solicitante a presentación do certificado resumo da declaración anual do imposto da renda das persoas físicas ou o certificado de imputacións, de ser o caso, dos membros computables da súa familia.

CÁLCULO DA RENDA FAMILIAR (artigo 9 do RD 951/2018 do 27 de xullo)

Para os efectos desta convocatoria a renda familiar calcularase como segue:

- 1 A renda familiar obterase pola agregación das rendas de cada un dos membros computables da familia que obteñan ingresos de calquera natureza, calculadas segundo se indica nos parágrafos seguintes e de conformidade coa normativa reguladora do Imposto sobre a Renda das Persoas Físicas estatal. Para os efectos desta convocatoria computarase o exercicio 2017.
- 2 Para determinar a renda dos membros computables que presentaran declaración polo imposto sobre a renda das persoas físicas, procederase do seguinte modo:
 - a) Sumarase a base imponible xeral coa base imponible do aforro e excluíranse todos os saldos netos negativos de ganancias e perdas patrimoniais de 2013 a 2016 e o saldo neto negativo de rendementos do capital mobiliario de 2013 ao 2016 para integrar na base imponible do aforro.
 - b) Deste resultado restarase a cota resultante da autoliquidación.
- 3 Para determinar a renda dos membros computables que obteñan ingresos propios e non presentaran declaración polo Imposto sobre a Renda das Persoas Físicas, seguirase o procedemento descrito no parágrafo a) anterior e do resultado obtido restaranse os pagamentos a conta efectuados.

Deducións da renda familiar: artigo 10 do RD 951/2018 do 27 de xullo

No curso 2018-19, aplicaranse as seguintes deducións da renda familiar:

- 1 O 50 % dos ingresos achegados por calquera membro computable da familia distinto aos sustentadores principais.
- 2 525 euros por cada irmán/irmá que sexa membro computable e conviva no domicilio familiar, incluído o solicitante, cando se trate de familias numerosas de categoría



xeral, e 800 euros para familias numerosas de categoría especial, sempre que teña dereito a este beneficio. Cando sexa o/a propio/a solicitante o titular da familia numerosa, as cantidades sinaladas serán computadas en relación cos fillos que a compoñan. Esta dedución será de até 2000 euros na convocatoria de axudas para o alumnado con necesidade específica de apoio educativo.

- 3 1811 euros por cada irmán/irmá ou fillo/a da persoa solicitante ou a propia persoa solicitante que presente discapacidade legalmente recoñecida de grao igual ou superior ao 33 %; ou 2881 euros cando a discapacidade sexa de grao igual ou superior ao 65 %. Esta dedución será de 4000 euros pola persoa solicitante e outro tanto por cada un dos seus irmáns con discapacidade legalmente cualificada de grao igual ou superior ao 33 % na convocatoria de axudas para alumnado con necesidade específica de apoio educativo.
- 4 1176 euros por cada irmá/n da persoa solicitante menor de 25 anos ou a propia persoa solicitante que curse estudos universitarios e resida fóra do domicilio familiar, cando sexan dous ou máis os estudantes con residencia fóra do domicilio familiar por razón de estudos universitarios.
- 5 O 20 % da renda familiar cando a persoa solicitante sexa orfa absoluta e menor de 25 anos.

Outros límites indicativos (artigo 11 do RD 951/2018 do 27 de xullo)

Independentemente de cal sexa a renda familiar calculada segundo o disposto nos apartados anteriores, denegarase a solicitude da axuda para transporte para o curso 2018-19 cando se superen os límites indicativos de patrimonio familiar que se fixan a continuación:

- 1 A suma dos valores catastrais dos predios urbanos que pertencen aos membros computables da familia, excluída a vivenda habitual, non poderá superar os 42 900 euros. No caso de inmobles en que a data de efecto da última revisión catastral estivese comprendida entre o 1/01/1990 e o 31/12/2002, multiplicaranse os valores catastrais por 0,49. No caso de que a data da mencionada revisión fose posterior ao 31/12/2002, os valores catastrais multiplicaranse polos coeficientes seguintes:

Por 0,43 os revisados en 2003
Por 0,37 os revisados en 2004
Por 0,30 os revisados en 2005
Por 0,26 os revisados en 2006
Por 0,25 os revisados en 2007
Por 0,25 os revisados en 2008
Por 0,26 os revisados en 2009
Por 0,28 os revisados en 2010
Por 0,30 os revisados en 2011
Por 0,32 os revisados en 2012
Por 0,34 os revisados en 2013
Por 0,36 os revisados en 2014
Por 0,36 os revisados en 2015
Por 0,36 os revisados en 2016
Por 0,36 os revisados en 2017



Nos inmobles situados na Comunidade Foral de Navarra o valor catastral multiplicarase en todo caso por 0,50.

A Dirección Xeral do Catastro facilitará a relación de municipios que correspondan a cada unha das situacións indicadas, para os efectos de aplicar o coeficiente de ponderación.

- 2 A suma dos valores catastrais das construcións situadas en predios rústicos, excluído o valor catastral da construción que constitúa a vivenda habitual da familia non poderá superar os 42 900 euros, ás citadas construcións seranlle de aplicación os coeficientes multiplicadores en función do ano en que se efectuara a última revisión catastral que se establece no apartado anterior.
- 3 A suma dos valores catastrais dos predios rústicos, excluídos os valores catastrais das construcións que pertencen a membros computables da familia non poderá superar 13 130 euros por cada membro computable.
- 4 A suma dos rendementos netos reducidos do capital mobiliario mais o saldo neto positivo de todas as ganancias e perdas patrimoniais pertencentes aos membros computables da familia non poderá superar os 1700 euros.

Non se incluírán nesta suma as subvencións recibidas para adquisición ou rehabilitación da vivenda habitual, a renda básica de emancipación, nin o importe dos premios en metálico ou en especie obtidos pola participación en xogos, concursos, rifas ou combinacións aleatorias inferiores a 1500 euros. As ganancias patrimoniais derivadas dos mencionados premios computaranse segundo a normativa do IRPF.

O valor destes elementos indicativos de patrimonio determinarase de conformidade co disposto na normativa estatal do IRPF polo seu valor a 31/12/2017.

- 5 Cando sexan varios os elementos indicativos do patrimonio descritos nos apartados anteriores de que dispoñan os membros computables da familia, calcularase a porcentaxe do valor de cada elemento respecto ao límite correspondente. Denegarase a axuda para transporte cando a suma das referidas porcentaxes supere o valor cen.
- 6 Tamén se denegará a axuda para transporte cando se comprobe que a suma dos ingresos que se indican a continuación obtida polos membros computables da familia supere a cantidade de 155 500 euros:
 - a) Ingresos procedentes de actividades económicas en estimación directa ou en estimación obxectiva.
 - b) Ingresos procedentes dunha participación dos membros computables igual ou superior ao 50 % en actividades económicas desenvolvidas a través de entidades sen personalidade xurídica ou calquera outra clase de entidade xurídica, unha vez aplicada aos ingresos totais das actividades a porcentaxe de participación nestas.
- 7 Para os efectos do cómputo do valor dos elementos a que se refiren os parágrafos anteriores, deducirase o 50 % do valor dos que pertencen a calquera membro computable da familia, excluídos os sustentadores principais.



MEMBROS COMPUTABLES

- 1 Para o cálculo da renda familiar para efectos desta convocatoria, serán membros computables os pais ou, se for o caso, o titor ou persoa encargada da garda e protección do menor, quen terán a consideración de sustentadores principais da familia. Tamén serán membros computables a persoa solicitante, os irmáns solteiros menores de 25 anos e que convivan no domicilio familiar a 31/12/2017 ou os de maior idade, cando se trate de persoas con discapacidade física, psíquica ou sensorial, así como os/as ascendentes dos pais que xustifiquen a súa residencia no mesmo domicilio que os anteriores co certificado municipal correspondente.

No caso de solicitantes que constitúan unidades familiares independentes, consideraranse membros computables e sustentadores principais a persoa solicitante e o seu cónxuxe, a súa parella, rexistrada ou non, a quen estea unida por análoga relación. Tamén serán membros computables os fillos, se os houber, que convivan no mesmo domicilio.

- 2 No caso de divorcio ou separación legal ou de feito dos pais non se considerará membro computable aquel deles que non conviva coa persoa solicitante de bolsa. Non obstante, de ser o caso, terá a consideración de membro computable e sustentador principal o novo cónxuxe, parella, rexistrada ou non, ou persoa unida por análoga relación cuxas rendas e patrimonio se incluírán dentro do cómputo da renda e patrimonio familiares. Ademais terá a consideración de membro computable a persoa con ingresos propios que na referida data conviva no domicilio coa persoa solicitante cando non medie relación de parentesco e non se poida xustificar un alugueiro de piso compartido.

Cando o réxime de custodia dos fillos sexa o de custodia compartida consideraranse membros computables o pai e a nai do solicitante, os fillos comúns e os ascendentes do pai ou da nai que xustifiquen a súa residencia no mesmo domicilio que os anteriores co certificado municipal correspondente.

- 3 Nos supostos en que o solicitante da bolsa ou axuda sexa un menor en situación de acollemento seralle de aplicación á familia de acollida o disposto nos parágrafos anteriores. Cando se trate dun maior de idade terá a consideración de non integrado na unidade familiar para estes efectos, sempre e cando de feito non subsistan as circunstancias de integración coa familia de acollida e así se acredite debidamente.
- 4 Nos casos en que o solicitante alegue a súa emancipación ou independencia familiar e económica, calquera que sexa o seu estado civil, deberá acreditar documentalmente esta circunstancia, e que conta cos medios económicos propios suficientes que lle permitan a súa independencia así como a titularidade ou alugueiro do seu domicilio habitual. En caso contrario, e sempre que os ingresos acreditados resulten inferiores aos gastos soportados en concepto de vivenda e outros gastos considerados indispensables, entenderase non probada a independencia polo que, para o cálculo da renda e do patrimonio familiar para os efectos de axuda ao transporte, se computarán os ingresos correspondentes aos membros computables da familia a que se refiren os apartados 1 e 2 deste artigo.

Tratándose de estudantado independente ou que forme parte de unidades familiares independentes, entenderase por domicilio familiar aquel en que o/a alumno/a habite durante o curso, por coincidir nestes casos a residencia do estudante durante o curso co seu domicilio familiar.



A independencia familiar acredítase mediante un padrón distinto aos dos proxenitores nun domicilio propio, en propiedade ou alugueiro, só ou compartido, e que non pertenza a ningún familiar ata o 4º grao de consanguinidade ou 2º de afinidade.

A Universidade da Coruña (UDC) poderá denegar esta axuda ou revogala no caso de que se apreciaren ou detectaren unidades familiares que xustifiquen uns ingresos que obxectivamente están por debaixo do nivel de gastos, se non acredítaren os medios de vida cos que contan.

ALEGACIÓN DE INDEPENDENCIA FAMILIAR

Aquel alumnado que alegue independencia familiar e económica deberá acreditar documentalmente esta circunstancia, os medios económicos con que conta e a titularidade ou alugueiro do seu domicilio. Para determinar os medios económicos utilizarase como referencia o Indicador Público de Renda de Efectos Múltiples (IPREM) que anualmente aproba o Goberno. Para o ter en conta, deberá cumprir cando menos estes requisitos:

- a) Demostrar a titularidade ou o alugueiro do seu domicilio.
- b) Levar empadroadado nese domicilio cando menos todo o ano 2017.
- c) Tívese, como mínimo, os ingresos anuais por renda no ano 2017 que marca o IPREM (Indicador Público de Renda de Efectos Múltiples).



ANEXO II

DOCUMENTOS OBRIGATORIOS QUE HAI QUE PRESENTAR COA SOLICITUDE DE AXUDA PARA TRANSPORTE URBANO PARA UNIVERSITARIOS

1 Documentación xeral:

- Fotocopia do DNI da persoa solicitante e dos membros da unidade familiar
- Certificado de convivencia conxunta da unidade familiar

2 Documentación económica:

A UDC comprobará coa AEAT os datos de todos os membros computables da unidade familiar.

No caso de non ter a obriga de presentar a declaración da renda, e non haxa datos de imputación na AEAT deberá achegar, segundo sexa o caso, documentación pola que se xustifiquen os ingresos:

- Certificado de imputación de renda expedido polo organismo similar á Axencia Tributaria correspondente ao exercicio 2017 no caso de teren ingresos no estranxeiro, certificado expedido pola Seguridade Social dos períodos de cotización e certificados de haberes e retencións destes; certificado de prestación e subsidios de desemprego; documento da/s entidade/s bancaria/s en que consten os rendementos de capital mobiliario e ganancias e perdas patrimoniais percibidas durante o ano 2017.
- No caso de seren pensionistas copia do xustificante anual da pensión ou pensións.

Fotocopias dos recibos da contribución urbana e rústica (catastro) do exercicio 2017, **excluída a vivenda habitual.**

De ser o caso deberase achegar tamén:

- Copia da sentenza de separación ou divorcio e convenio regulador
- Copia da acta de constitución de sociedades e do imposto de sociedades así como o resumo anual dos impostos sobre o valor engadido (IVE).
- Xustificación da situación que dá dereito a algunha das deducións establecidas nesta convocatoria.

A Universidade da Coruña (UDC) convoca as presentes axudas de transporte dirixidas a facilitar o estudo ao alumnado desta universidade, de acordo co artigo 45 da Lei orgánica 6/2001, do 21 de decembro, de universidades así como co artigo 63 dos Estatutos da UDC.

Tarxeta Xente Nova

O alumnado que inicie estudos universitarios e sexa menor de 19 anos poderá solicitar a TMG Xente Nova (<https://tmg.xunta.gal/xente-nova-que-e>) que permite realizar todas as viaxes interurbanas gratúitas. Unha vez que cumpra os 19 anos poderá seguir usando a tarxeta ata que se esgote o saldo.

O alumnado afectado por esta circunstancia terá a obriga de lle comunicar a Sección de Bolsas a data en que esgotou as viaxes para activar a outra TMG.